

# Afganistanski vojnik ubio Francuze zbog video snimka

22 Jan 2012 Izmijenjeno 21:52 CET

**Ubistvo četiri francuska vojnika je uslijedilo nakon što je objavljen video snimak na kome se vide američki marinci kako uriniraju po tijelima talibanskih boraca**



Francuski ministar odbrane Gerard Longe je posjetio francuske vojnike u Afganistanu [EPA]

Afganistanski vojnik koji je ubio četiri francuska vojnika izjavio je da je to učinio zbog nedavnog video snimka na kome se vide američki marinci kako uriniraju po tijelima talibanskih boraca, rekli su bezbjednosni izvori. Napad na vojnike, koji su bili nenaoružani, dogodio se u petak u bazi na istoku Afganistana. U ovom napadu povrijeđeno je 15 francuskih vojnika, od toga osam veoma teško. "Tokom ispitivanja, afganistanski vojnik rekao je da je to učinio kada je vidio snimak na kome američki vojnici uriniraju po tijelima talibana", prenio je oficir afganistanske armije. Uhapšeni afganistanski vojnik naveo je da mu je dodatni motiv bio video snimak na kome britanski vojnici zlostavljaju afganistansku djecu, kazao je izvor u ministarstvu odbrane.

Dodatni motiv bio je video snimak na kome britanski vojnici zlostavljaju afganistansku djecu.

Manje od sedam dana nakon objavljivanja snimka s marincima britanska vojna policija uhapsila je dva vojnika zbog zlostavljanja afganistanskog dječaka i djevojčice uzrasta 10 godina, što su i snimili. Glasnogovornik britanske ambasade u Kabulu rekao je da je istraga o ovom slučaju u toku.

## Izoliran pojedinačni čin

Afganistanski predsjednik Hamid Karzai je ranije u nedjelju izjavio je da ubistvo četiri francuska vojnika predstavlja "izoliran pojedinačni čin" i ne odslikava bijes afganistanskog naroda.



Hamid Karzai [AFP]

On je, poslije sastanka s francuskim ministrom odbrane Gerardom Longeom, koji je doputovao u Afganistan nakon ubistva u petak, izrazio žaljenje zbog ovog incidenta. "Napad afganistanskog vojnika na francuske snage ne predstavlja bijes afganistanskog naroda, već samo izoliran pojedinačni čin", kazao je Karzai, prenosi AFP. Longe je otputovao u Afganistan kako bi procijenio bezbjednosnu situaciju na terenu, dan pošto je predsjednik Francuske Nicolas Sarkozy najavio da će možda ubrzati povlačenje kontingenta od oko 3.600 vojnika koji se već deset godina bore u toj zemlji. Samo nekoliko sati ranije četverica nenaoružanih pripadnika francuskog kontingenta su ubijeni, a 15 ih je ranjeno, od kojih osam teško, kada je na njih otvorio vatru afganistanski vojnik u bazi Kapisa, na istoku Afganistana.

Dvadesetjednogodišnji Afganistanac, identificiran kao Abdul Mansur, uhapšen je odmah poslije ubistva.

Talibani su u međuvremenu saopćili da istražuju da li je afganistanski vojnik bio povezan s pobunjenicima, napominjući da pojedine napade afganistanskih vojnika podstiču isključivo patriotizam i bijes prema "neprijatelju osvajaču".

*Izvor: Al Jazeera*